



# Tgi elegian Grischunas e Grischuns en la regenza?

Retschertga represchentativa trais mais avant las elecziuns da la regenza grischuna

DA MARTIN CABALZAR

**Barbara Janom Steiner (pbd) e Mario Cavigelli (pcd) han bunas schanzas da vegnir reelegids cun il meglier resultat en la regenza grischuna. Era lur collegas Christian Rathgeb (pld) e Martin Jäger (ps) dastgan quintar cun ina reelecziun. Dapli tensiun datti tar l'occupaziun da la tschintgavla sutga. La distanza tranter Heinz Brand (pbd) e Jon Domenic Parolini è pitschna. Pitschnas schanzas da vegnir elegi ha il candidat verd-liberal Jürg Kappeler.**

Quai èn almain ils resultats d'ina retschertga che l'institut DemoScop ha fatg per incarica da Radio Televisiun Rumantscha (RTR) e da Südostschweiz Medias. Tranter ils 27 da schaner ed ils 11 da favrer ha l'Institut per la la perscrutaziun d'opiniuns contactà e dumandà al telefon 1002 persunas en il Grischun davart lur tenuta tar las elecziuns da la regenza che han lieu ils 18 da matg. Sin fundament dal dumber dals interrogads dastga la retschertga vegnir considerata sco represchentativa. Sco quai che Werner Reimann da l'Institut DemoScop punctuescha na sajan ils resultats «anc betg ina prognosa, mabain sulettain ina inventarisaziun dal stan actual».

**Bunas schanzas per ils cussegliers en uffizi**

Il meglier resultat en la retschertga fatga ha la suletta dunna en la regenza grischuna Barbara Janom Steiner da la Partida burgais-democratica cuntanschi. A la dumonda a tge candidata u a tge candidat che la persuna interrogada vegness a dar concretain la vusch han 56 perschienschi menziunà il num da Barbara Janom Steiner. Sulet ses collega Mario Cavigelli da la Partida cristiandemocratica

ha cuntanschi in resultat paregliabel. El è vegnì numnà da 54 perschienschi dals interrogads. Ils nums dal directur da giusticia Christian Rathgeb dals liberals e dal directur d'educaziun Martin Jäger dals socialdemocrats han mo 41 perschienschi, resp. 40 perschienschi numnà.

Ils cussegliers guvernativs en uffizi che candideschon per ina ulteriura perioda d'uffizi survegnan andantas notas dals electurs potenzials. Lur notas èn alur er identicas cun il dumber d'electurs potenzials. La meglera nota survegn Barbara Janom cun 4,5 suandà da Mario Cavigelli cun 4,4, Christian Rathgeb cun 4,3 e Martin Jäger cun 4,0.

**Preferenzas dals candidats tenor regiuns**

Interessants resultats intermediesscha la retschertga pertutgant l'acceptanza ed il sustegn dals candidats en las differentas regiuns. Frappant è il fatg che la cussegliera guvernativa protestanta ord l'Engiadina Bassa cuntanscha en la Surselva predominantain catolica l'excellent resultat da 62 perschienschi, entant che quai è «mo» 57 perschienschi en sia patria nativa e 61 perschienschi en ses lieu da domicil a Cuira e conturn. In excellent sustegn ha ses collega da la pcd Mario Cavigelli cunzunt en Surselva cun confortabels 73 perschienschi, en la Val Renana cun 58 perschienschi, en il Grischun central cun 57 perschienschi ed en las valladas talianas cun 47 perschienschi.

Il cusseglier guvernativ liberal va cun la plima cunzunt en l'aglomeraziun da Cuira fin Landquart cun 49 perschienschi ed en il Grischun central cun 46 perschienschi. Maximal 45 perschienschi per il socialdemocrat Martin Jäger datti en Surselva, mingamai 44 perschienschi en la Val Renana ed en il Grischun central.

Er en lur agnans partidas paran ils cus-

segliers guvernativs en uffizi d'avair in bun sustegn. Il pli grond sustegn dat la pcd a ses candidat Mario Cavigelli cun 92 perschienschi, suandà dals liberals cun 90 perschienschi per Christian Rathgeb, dals socialdemocrats cun 89 perschienschi per Martin Jäger ed ils burgais-democrats cun 89 perschienschi per Barbara Janom Steiner.

**Differenzas tranter umens e dunnas**

La retschertga tradescha era la schlattaina e la vegliadetgna da las electuras e dals electurs potenzials cun lur preferenzas persunalas dals candidats. Tar la suletta dunna Barbara Janom Steiner è la cumpart dad electuras ed electurs potenzials quasi guliva, numnadain cun 58 perschienschi dals umens e 55 perschienschi da las dunnas. La gruppa plectentada il pli fitg dad ella è tranter 35 e 40 onns.

Tar Mario Cavigelli èn las proporziuns tranter um e dunna paregliablas. En egl dat dentant che Cavigelli plectenta malgrà ch'el è relativamain giuven cun 60 perschienschi cunzunt ils seniors sur 55 onns. In deficit ha Christian Rathgeb anc tar las dunnas: Mo gist 35 perschienschi vegnessan a dar ad el lur vusch, tar ils umens èn quai dentant 47 perschienschi. Er el para da plectentar cunzunt la generaziun pli veglia. Martin Jäger vegn preferi cun 40 perschienschi egualmain da las dunnas sco dals umens. Er el tendescha dentant da plectentar cunzunt in electorat che è pli vegl che 55 onns.

**Brand u Parolini**

Sco quai ch'ins supposeva gia conferma era la retschertga in cumbat per il tschintgavel sez tranter Heinz Brand (pps) e Jon Domenic Parolini (pbd). Lur differenza procentuala è pitschna. Brand para dentant d'avair bler dapli sustegn da sia agna partida, entant che il sustegn da

la pbd per ses parsura na para betg gist d'esser gloriuos. Pitschnas schanzas per acquistar in sez en la regenza vegn attribuì a Jürg Kappeler dals verd-liberals.

A vess l'elecziun da la regenza lieu dumengia proxima avess Heinz Brand fatg la cursa cunter ses antipod Jon Domenic Parolini e quai cun 34 cunter 31 perschienschi. La concurrenza verd-liberala ston Brand e Parolini dentant betg temair. Mo 16 perschienschi han inditgà Jürg Kappeler sco lur candidat potenzial. Entant che il parsura da la pps Heinz Brand sa quintar cun il sustegn dad 84 perschienschi da l'electorat da sia partida, sustegnan mo 58 perschienschi dals interrogads da la pbd ses parsura Jon Domenic Parolini. Il candidat verd-liberal charta in bun sustegn da 40 perschienschi tar ils socialdemocrats, Jon Domenic Parolini bels 29 perschienschi e Heinz Brand flaivels otg perschienschi. Da quai resulta che tant Heinz Brand sco Jon Domenic Parolini profitan cunzunt da sustegn da las ulteriuras partidas burgaisas. Tar la pcd e la pld è quai tranter 24 e 38 perschienschi, tar Jürg Kappeler tranter 12 e 15 perschienschi (incl. pbd).

**Preferenzas da las regiuns**

Cun grond sustegn (58%) sa Heinz Brand quintar en Partenz, entant che Parolini cuntanscha là mo 27% e Kappeler 12 perschienschi. Persuenter sa Jon Domenic Parolini quintar cun in bun sustegn (63%) en sia regiun nativa, entant che Brand e Kappeler ston sa cuntentar là cun 21 resp. 22 perschienschi. In grond bonus da simpatia para Heinz Brand d'avair en las valladas talianas. 35 perschienschi dals interrogads han sincerà ch'els vegnian a votar per Heinz Brand, 27 perschienschi per Parolini e 9 perschienschi per Kappeler.

Er en la regiun cun in grond potenzial electoral tranter Cuira e Landquart va Heinz Brand cun la plima e quai cun 32 perschienschi, suandà da Parolini cun 28 perschienschi e Jürg Kappeler cun 17 perschienschi.

**Tgi schlià il meglier ils problems?**

Ina ulteriura dumonda è stada tge partida che schlia il meglier ils problems actuals en las spartas economia, turissem, esters e fugitivs, scolaziun e furmazium, traffic e finanzas. La repartiziun da las medaglias sa preschenta sco suonda:

La Partida burgais-democratica survegn trais medaglias d'aur (economia, turissem e finanzas), 1 medaglia d'argient (politica d'esters e fugitivs ed ina medaglia da bronz (scolaziun e furmazium).

La Partida populara svizra gudogna medamamain 3 medaglias d'aur (politica d'esters e fugitivs, scolaziun e furmazium e traffic) e 3 medaglias da bronz (economia, turissem, e finanzas).

Ils liberals han 3 medaglias d'argient (economia, turissem e traffic) ed ina medaglia da bronz (finanzas).

La pcd ha mo 2 medaglias, ina d'argient (finanzas) ed ina da bronz (scola e furmazium).

Nagina medaglia datti per ils verd-liberals.

**Ils pli gronds problems da la populaziun**

Sco ils pli gronds problems dal chantun Grischun inditgeschan ils interrogads en la retschertga l'economia (12%), il turissem (9%), ils esters/fugitivs (7%), la scola e furmazium ed il traffic (6%), las finanzas e las taglias (4%), la mancanza da fiduzia en la politica (4%), auter (21%) e nagina indicaziun/nagin problem (25%).

